



ODLUKA
o utvrđivanju i načinu sufinansiranja kulturnih manifestacija
od posebnog interesa za Grad Sarajevo
(prijedlog)

Predlagač: Gradonačelnik Grada Sarajeva
Obrađivač: Gradska služba za obrazovanje, kulturu,
sport i mlade

Sarajevo, februar 2019. godine



Na osnovu člana 26. stav 1. tačka 2. Statuta Grada Sarajeva ("Službene novine Kantona Sarajevo", broj 34/08 - prečišćeni tekst), Gradsko vijeće Grada Sarajeva, na sjednici od __.__.2019. g., donosi:

(prijedlog)

ODLUKU
o utvrđivanju i načinu sufinansiranja kulturnih manifestacija
od posebnog interesa za Grad Sarajevo

I OPĆE ODREDBE

Član 1.

Ovom Odlukom utvrđuju se kulturne manifestacije od posebnog interesa za Grad Sarajevo i način njihovog sufinansiranja.

Član 2.

Kulturne manifestacije iz člana 1. ove Odluke su:

- Internacionalni teatarski festival MESS;
- Sarajevo Big Band;
- Međunarodna književna manifestacija „Sarajevski dani poezije“;
- Sarajevske večeri muzike SVEM;
- Internacionalni festival Sarajevo „Sarajevska zima“;
- Sarajevo film festival;
- Bašćaršijske noći;
- Internacionalni muzički festival JAZZ FEST Sarajevo;
- Balet Fest Sarajevo;
- Festival Bookstan;
- Festival dječije umjetnosti FEDU Sarajevo.

II KRITERIJI I NAČIN SUFINANSIRANJA KULTURNIH MANIFESTACIJA

Član 3.

Manifestacije iz člana 2. ove Odluke Grad Sarajevo će sufinansirati iz sredstava Budžeta Grada Sarajeva sa pozicije: Primjena Odluke o utvrđivanju i načinu sufinansiranja kulturnih manifestacija od posebnog interesa za Grad Sarajevo.

Član 4.

Sufinansiranje manifestacija iz člana 2. ove Odluke vršit će se u skladu sa općim i posebnim kriterijima i to:

a) Opći kriteriji

1. izvod iz registra podnosioca zahtjeva za sufinansiranje kulturnog programa, odnosno manifestacije (original ili ovjerena kopija ne starije od šest mjeseci);
2. uvjerenje o poreskoj registraciji - identifikacioni broj i broj transakcijskog računa u poslovnoj banci (original ili ovjerena fotokopija ne starije od šest mjeseci);

3. prijedlog kulturnog programa, odnosno manifestacije, sa specifikacijom troškova neophodnih za realizaciju;
4. obezbjeđenje tehničkih, ljudskih i materijalnih uslova neophodnih za realizaciju planiranih aktivnosti;
5. finansijski izvještaj o utrošku sredstva odobrenih u predhodnoj godini.

b) Posebni kriteriji

1. kvalitet i značaj ponuđenih kulturnih programa;
2. kontinuitet ponuđenih kulturnih programa;
3. stepen doprinosa afirmaciji bosanskohercegovačke kulture;
4. uticaj ponuđenih kulturnih programa na širu društvenu zajednicu;
5. uticaj ponuđenih kulturnih programa na međunarodnu promociju Grada Sarajeva;
6. uticaj ponuđenih kulturnih programa na razvoj turizma u gradu Sarajevu i BiH;
7. kulturni programi, koji odražavaju multikulturni i multietnički karakter Grada, kao regionalnog, kulturnog i privrednog centra;
8. manifestacije koje u svojim programima daju podršku mladim talentima i stvaraocima u kulturi.

Član 5.

Organizatori manifestacija su dužni podnijeti zahtjev za sufinansiranje manifestacije, gradonačelniku/ci Grada Sarajeva, putem Gradske službe za obrazovanje, kulturu, sport i mlade (u daljem tekstu: Služba), sa obrazloženim programom, planiranom finansijskim konstrukcijom programa tj. manifestacije, kao i kompletnom dokumentacijom kojom se dokazuje ispunjenje općih i posebnih kriterija, i to najkasnije do 30 septembra tekuće godine.

Član 6.

Programe iz člana 5. ove Odluke, Služba procjenjuje sa stanovišta značaja za Grad Sarajevo, odnosno njegovog posebnog interesa, u skladu sa kriterijima utvrđenim ovom Odlukom, te svoje stavove i mišljenje dostavlja Savjetu za kulturu, kojeg imenuje gradonačelnik/ca Grada Sarajeva. Savjet iz stava 1. ovog člana, razmatra predložene programe tj. manifestacije shodno valjanosti, značaju i kvalitetu istih, predlaže visinu iznosa sredstava neophodnih za realizaciju, te svoje stručno mišljenje, dostavlja gradonačelniku/ci Grada Sarajeva na dalji postupak. Konačnu Odluku o sufinansiranju kulturnih manifestacija donosi Gradsko vijeće Grada Sarajeva.

Član 7.

Organizatori manifestacije su dužni po završetku manifestacije, dostaviti gradonačelniku/ci Grada Sarajeva izvještaj o namjenskom utrošku sredstava, shodno Odluci o izvršavanju Budžeta Grada Sarajeva.

Ostala prava i obaveze Grada Sarajeva, utvrdit će se posebnim ugovorom gradonačelnika/ce Grada Sarajeva sa organizatorima manifestacija.

III PRELAZNE I ZAVRŠNE ODREDBE

Član 8.

Nadzor nad provedbom ove Odluke vrši gradonačelnik/ca Grada Sarajeva, putem Službe. Gradonačelnik/ca Grada Sarajeva se obavezuje da putem Službe jednom godišnje dostavi Gradskom vijeću Grada Sarajeva Izvještaj o provođenju ove Odluke. Gradsko vijeće Grada Sarajeva, prilikom utvrđivanja Budžeta Grada Sarajeva za narednu godinu vrši periodično revidiranje opravdanosti sufinansiranja kulturnih manifestacija iz člana 2. ove Odluke.

Član 9.

Gradonačelnik/ca Grada Sarajeva se obavezuje da u roku od 30 dana od dana stupanja na snagu ove Odluke formira Savjet za kulturu.

Član 10.

Izmjene i dopune Odluke, vrše se na način i po postupku za njeno donošenje.

Član 11.

Stupanjem na snagu ove Odluke prestaje da važi Odluka o utvrđivanju i sufinansiranju kulturnih manifestacija od posebnog interesa za Grad Sarajevo („Službene novine Kantona Sarajevo“, broj 15/08, 3/10, 29/12).

Član 12.

Ova Odluka stupa na snagu narednog dana od dana objavljivanja u „Službenim novinama Kantona Sarajevo“.

**PREDSJEDAVAJUĆI GRADSKOG VIJEĆA
GRADA SARAJEVA**

Igor dr. Gavrić

Broj:
Sarajevo,

OBRAZLOŽENJE PRAVNI OSNOV

Pravni osnov za donošenje Odluke sadržan je u članu 26. stav 1. tačka 2. Statuta Grada Sarajeva kojim je propisano da Gradsko vijeće Grada Sarajeva donosi odluke, druge propise i opće akte i daje njihovo tumačenje.

RAZLOZI DONOŠENJA

Imajući u vidu činjenicu da Grad Sarajevo već tradicionalno doprinosi organizaciji kulturnih manifestacija i to pružanjem finansijske podrške iz sredstava Budžeta Grada Sarajeva, to se i ukazala potreba za preciziranjem manifestacija kulture od posebnog interesa za Grad Sarajevo, a koje se održavaju na području grada Sarajeva. Organizacijom kulturnih manifestacija, kao što su internacionalni festivali i uopšte festivali kulture, u znatnoj mjeri se doprinosi afirmaciji grada Sarajeva, a i ukupnom razvoju kulture na području Bosne i Hercegovine.

Također, primjećeno je da se jedan broj kulturnih manifestacija koje su utvrđene ranijom Odlukom više ne održava, a pojedini organizatori manifestacija ne dostavljaju svoje zahtjeve za sufinansiranje manifestacije Gradu Sarajevu. Stoga se ukazala potreba za donošenjem nove Odluke o utvrđivanju i načinu sufinansiranja kulturnih manifestacija od posebnog interesa za Grad Sarajevo. S tim u vezi Gradsko vijeće Grada Sarajeva je na sjednici održanoj 18.12.2018. godine, utvrdilo Nacrt Odluke o utvrđivanju i načinu sufinansiranja kulturnih manifestacija od posebnog interesa za Grad Sarajevo, te Zaključkom broj: 01-GV-02-1416/18 od 18.12.2018. godine, isti uputilo u javnu raspravu. Shodno dostavljenim primjedbama, prijedlozima, mišljenjima i sugestijama učesnika u javnoj raspravi, kako je to navedeno u Izvještaju o provedenoj javnoj raspravi, a koji je sastavni dio ove Odluke, uvažavajući izneseno, sačinjen je tekst Prijedloga Odluke Odluke o utvrđivanju i načinu sufinansiranja kulturnih manifestacija od posebnog interesa za Grad Sarajevo. Imajući u vidu naprijed navedeno, Gradsko vijeće Grada Sarajeva je donijelo ovu Odluku.

OBRAZLOŽENJE PREDLOŽENIH RJEŠENJA

Članom 1. i 2. Odluke utvrđuje se koje su kulturne manifestacije od posebnog interesa za Grad Sarajevo, kao i način njihovog sufinansiranja.

Članom 3. propisuje se sa koje pozicije će se sufinansirati kulturne manifestacije.

Članom 4. propisuju se opći i posebni kriteriji za sufinansiranje manifestacija.

Članom 5. propisuje se obaveza organizatora manifestacije.

Članom 6. propisuje se postupak i način rada Službe i Savjeta za kulturu.

Članom 7. propisuje se obaveza organizatora manifestacije za dostavljanje izvještaja o namjenskom utrošku sredstava, kao i da se ostala prava i obaveze utvrđuju zaključenjem posebnog ugovora gradonačelnika sa organizatorom manifestacije.

Članom 8. propisuje se ko vrši nadzor nad provođenjem Odluke, podnošenje izvještaja jednom godišnje, te obaveza Gradskog vijeća da svake godine vrši provjeru opravdanosti sufinansiranja utvrđenih kulturnih manifestacija.

Članom 9. propisuje se obaveza formiranja Savjeta za kulturu.

Članom 10., 11. i 12. propisuje se način izmjena i dopuna Odluke, prestanak važenja ranije, te stupanje na snagu Odluke.

FINANSIJSKA SREDSTVA

Finansijska sredstva za realizaciju ove Odluke nisu potrebna, a finansijska sredstva za realizaciju kulturnih manifestacija od posebnog interesa za Grad Sarajevo su obezbijedena u Budžetu Grada Sarajeva.